



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 10

Yangia anidakangma :

Tir Yimiyim

tiryimiyim@aolima

tir yimiyim

TAPAK 7



Puliscic nem US Soccer's male player of the year naroküm agütsü



Ola balala adokba party tem ka kuma longjemtsü: Shashi Tharoor

VOL. XIX NO. 73 (ADOK 73)

DIMAPUR

TENTONÜ (MONDAY)

LUCHII (DECEMBER) 20, 2021

₹ 5.00

Christmas ajanga ka kuma longjemdi: CM Neiphiu Rio

Kohima, December 19, 2021 (TYO): Telungpur teloktem aser tema nung civil society teloktem dena Naga nung putepa mali anungji Christmas mapang longjemtsü aser ka akümtsü ayongzüker, ta Nagaland Chief Minister Neiphiu Rio-i ashi.

Kohima district kübok Botsa Baptist Church kum 50 ajungba jubilee nung jembidang Rio-i "Naga nung kati ka ashiba mangar aser pei bilemba ama dang inyaksangshia aoba ajanga melongjemer" ta ashi.

"Naga nung longjema

alitsüla aser ibaji inyaksü atema Christmas ya mapang tajung lir. Linük, jila mesüra loktiliba nung telongjem melira tashi maitsü aser laodoktsü" ta paisa ashi.

Naga yimten latettsü atema nisung ajak külemi inyaksüla, ta Rio-isa metetdaksü.

"Asen kidang temoatsü alitsü atema Christmas tanüla chichiba nung asenok kati ka meimtepdi. Taoba mapang aibelenba atema tang ya tatok agütsüba mapang ka aser kati ka den yimjung nung alitsü mapang ka lir" ta paisa ashi.

COVID-19 Nagaland: Nisung 2 taneptsü angu

Kohima, December 19, 2021 (TYO): Nagaland nung Deobarnü COVID-19 puteta alir ana taneptsü anguba dak alaka shinga dak-a meputet.

"Dimapur nung nisung 2 taneptsü angu" ta Integrated Disease Surveillance Project atema State Nodal Officer, Dr Nyanthung Kikon-i ashi.

Nisung 32,169 rongnungi 30,317 taneptsü nguogo aser ibaji taneptsü angur 94.24% lir, ta pai ashi.

Tang nisung 82 anepaludar saka parnok 65 dak shirangba yimya kecha mali, ta Dr. Kikon-isa shisem.

"Honibar tashi nung nisung

757,196 nem COVID-19 vaccine indang dose 13,28,268 agütsüogo" ta State Immunization Officer Dr Ritu Thurr-ia ashi.

Vaccine agirtemji frontline workers 60,983, healthcare workers 16,005, arishi kum 45 ser tempapur 213,572 aser arishi kum 18 nungi 44 tsungda alir 466,636 lir, ta paisa ashi.

"Vaccine agirtem rongnungi nisung 571,072-i dose anaprong agiogo. Parnokji frontline workers 48,603, healthcare workers 13,540, arishi kum 45 ser tempapur 177,902 aser arishi kum 18 nungi 44 tsungda alir 331,027 lir" ta Dr Thurr-isa metetdaksü.

Kiralongraba anema jungjunga inyaksüla: CM Pema Khandu

Itanagar, December 19, 2021 (Agencies): Kiralongraba ya mapa anema kanga dang jungjunga inyaksüla ta Arunachal Pradesh chief minister Pema Khandu-i ashi.

Nübertemi Armed Forces Special Powers Act (AFSPA) agientsü ola adokba atema tasüngdangba ka langzüdang pai iba olen ashi.

"Arunachal Pradesh kübok foothill areas nungi AFSPA agienogo aser tang district 3 nung lir saka tensa tajungba kumra item district nungia agientsü" ta CM Khandu-i ashi.

Ita 6 shia tensa meyipa reprangshir, ta paisa shisem.

India sorkari Arunachal Pradesh kübok district 3- Tirap, Changlang aser Longding nung AFSPA atsülangogo.

Sepaitemi maitsü aibelenba Naga nung civilian 14 tepsetba sülen nungi AFSPA agientsü atema ola tuluba adoka arur.

Iba sentong ya civil society teloktem aser North East Students' Organization (NESO) ajanga ketdangüsü inyaker.

Oting aser Konyak Naga nung pusema nungittsü: FNR



December 19, 2021 nikongdang Forum for Naga Reconciliation (FNR)-i Dimapur nung sepaitemi Oting yim aser Mon nung tepsetertem bilemteta sentong ka agiba angur.

Dimapur, December 19, 2021 (TYO): Deobarnü Forum for Naga Reconciliation (FNR) teloki lokti sentong ka ayonga agidang Oting yim aser Konyak Naga nung den külemi noktaksü bangjemtepogo.

December 19, 2021 nü Christian Higher Secondary School, Dimapur nung December 4 aser 5 anogotem Oting aser Mon nung nisung tepsetba mangyimtsü atema FNR-i iba sentong ayongzüka agi.

21st Para Special Forces Regiment ajanga Naga nung civilian tem tepsetba atema jashir. Nisung ka taküm alitsü temeten alema inyaksangshiba ya mapa tamajungtibaji lir anungji India sorkar dang Armed Forces Special Powers Act (AFSPA), 1958 tangsa agientsü aser Oting

o Mon nung tepsetertem nem temeten agütsütsü takhangba agütsür, ta tanü senden nung telok 26 den FNR-i bangjemtep.

December 4, 2021 nü Oting nung civilian 13 tepsetba aser ano 14 yirutsüba atema 21st Para Special Forces Regiment Commanding Officer aser sepaitem merenshitsu, ta parnokisa takhangba agütsü.

Maneni, December 5 nü Mon jila nung civilian ka tepsetba aser nisung 18 yirutsüba atema 27th Assam Rifles Commanding Officer aser sepaitem merenshitsu, ta parnokisa metetdaksüogo.

Oting aser Mon nung lendong atalokba ya Naga nung meyipa reprangshitsu aser külemi longjemtsüba maongka ka lir, ta FNR-i ashi.

Naga yimten teloktem tsungda

obang meputep alibatem angatetteptsüla aser putepshia longjemtsüba den Naga nung külem putiotsü aser yimten temeten nung ajemdaker amalitep alitsü ayongzüker, ta parnokisa metetdaksü.

Naga nung tema aser telung nung alir lennir ajaki party politics aser pei taginüba toktsür ozüngi melaba ama Naga nung len anitsü ayongzüker, ta FNR-isa ashi.

Naga nung tsungda telemsa adokdaksüba aser kin o kin lemsaba anema noktaksüla, ta FNR-isa ayongzüker.

Iba sentong nung FNR Oting team-i Konyak nung tasürtem bilemteta noksatem sayu aser Konyak Union, Dimapur President Mosa Konyak o Oting nung Nyawang Wangsha nati lendong atalokba otsü lemsatet.

Tanga state tem nungi nakmati abenba truck garitem Assam nung sottsü makok

Guwahati, December 19, 2021 (Agencies): Tanga state tem nungi nakmati abenba garitem Assam nung sota mayutsüla aser touzük maotsüla ta Deobarnü Chief Minister Himanta Biswa Sarma-i metetdaksü.

"Assam ajanga süiba truck garitem den kidanger state tem den tesentaktep tajung ayutsü atema tanga state tem nungi aruba truck

garitem Assam adena senzüdaktsütsüla" ta Sarma-i metetdaksü.

Nübertemi takhangba agütsüra state sorkari weighbridge mesüra check-gate amala lapoktsü akok saka iba ajanga traffic timtem ajurubaji nübertemi aremtsüla, ta paisa ashi.

Assam nungi nakmati abenba truck garitem anema state sorkari inyaksü akok saka Assam ketdangsürtemi tanga state tem

nungi aruba truck garitem sotra tesentaktep mejungi akümtsü, ta Sarma-isa ashi.

"Asen state nungi aoba truck garitem nem tanga state temi timtem agütsüra asenoki kechi bilemtsü?" ta paisa asüngdang.

Tanga state tem den tesentaktep tajung ayutsü atema asenoki kanga kümdanga inyaksangshitsu, ta Assam CM Sarma-isa metetdaksü.

VHP-i ozüng alema tamangba yimsü melenba anema campaign tenzüker 'Anti-conversion law' yanglutsü & Constitution yanglushitsü akhanger

New Delhi, December 19, 2021 (Agencies): India kübok state pungu nung Assembly election agitsü aliba jakdang Vishwa Hindu Parishad (VHP)-i ozüng alema tamangba yimsü meyipba inyakyim anema anogo 12 nü linük ajungalen lungkak aittsü.

"Iba campaignya December 20, 2021 nungi tenzüksü aser December 31 nü tembangtsü" ta VHP national joint general secretary, Surendra Kumar Jain-i ashi.

"Christian missionary tem aser putirtemi tashiyim agi tamangba yimsü melendaktsür. Corona wara mapang nübertem timtemba aser senotsü khuret ajuruba nung maongka agia parnoki nisungtem temolung meyipdaksür. Ozüng alema tamangba yimsü melendaktsübaji forest aser Scheduled Tribes nung lir" ta pai ashi.

VHP-i anogo 11 lungkak aitba mapang Centre sorkar dang ozüng alema tamangba yimsü melendaktsüba anema ozüng

tesashi ka yanglutsü takhangba agütsütsü.

Parnokisa Islam o Christianity dangi meyipba lisopurtem nem Constitution kübok scheduled tribes nem agütsüba reservation benefits aser tanga facilities magütsütsü atema takhangba agütsür.

"Linük ajungalen campaign metenzükdang VHP-i political party balala nungi MP 327 den ajurutepogo. Onoki BJP, Congress, JD(U), RJD, AAP, TMC, CPI(M) aser NC teloktem dena MP balala den ajurutepa onoki akhangba onüktem pusema nungittsü atema teyari meshiogo" ta VHP working president Alok Kumar-ia ashi.

December 31 tashi agitsü aliba campaign nung VHP-i Hindu loktiliba akangshitsü atema sentong balala ayonga agitsü ta paisa ashi.

"Tanga tamangba yimsü agizükertem tanaben Hindu yimsü dangi meyipdaksütsü atema

merangtsü" ta Alok Kumar-isa shisem.

"Hindu nung tanga yimsü dangi meyipbaji molungsentü melenshiba ajanga masü saka parnok mesüzükba, tsübudaktsüba mesüra külakokja temolung meyipdaksür. Mesüzükba, tsübudaktsüba mesüra külakokja tamangba yimsü melendaktsübaji Constitution ajanga tamangba yimsü nüjiso agütsüba anema lir" ta paisa ashi.

"State aser Centre sorkartemi iba atema ozüng tesashi ka yanglutsüla" ta Kumar-isa ashi.

"Onoki akokba tashi Member of Parliament (MP) tem den ajuruteptsü. Tang tashi nung

onoki MP 327 den ajurutepogo aser parnok rongnung Muslim nung 10 aser Christian 8 dena lir. Onoki MP shia den balala ajurutep aser onok tebilembatem metetdaksüogo. Onoki parnok tenüng yimjak nung memetdaksü nangzüko aser ajaki haihaura kaogo" ta VHP ketdangsürisa metetdaksü.

"Uttar Pradesh aser Madhya Pradesh state tem nung 'anti-conversion law' yangluba aser nisung kar merenshiba ajanga tangbo tamangba yimsü melenba aser "love jihad" kanga ajema kümogo" ta Alok Kumar-isa ashi.

"Arogoi 'Changai Sabha' (healing meetings) amala sentong tasa atonger ozüng alema tamangba yimsü meyipdaksür. Missionary temi arem-min nung alirtem, yimdaklirtem aser backward nisungtem dak tenük yoka iba mapa inyaker. Taoba kum 25 tsungda arogo lapokba denbo Corona wara mapang teimtiba lapokogo ta missionary temia

nangzüko" ta paisa ashi.

"Missionary temi lisopurtem Christianity dangi meyipdaksütsü atema sen dollar million aika endokogo, saka parnoki item kintem nungi 18% tashi dang tamangba yimsü melendaktsüogo. Külen, America, Australia aser New Zealand nungbo parnoki lisopur 100% tashi tamangba yimsü melendaktsüogo" ta Kumar-i metetdaksü.

Tang missionary temi nisungtem ashioktsütsü atema tenla kitem dang Dham mesüra Mandir ta ajar aser Yisu ji Krishna ama sayua saffron sübotsütem agir, ta paisa ashi.

"Nisung aikati Islam aser Christianity toktsür Hinduism dangi meyipa arur (Ghar Wapsi). Hindu nung loktiliba dang chichiba sobaliba agizüktsü aser iba den liromedema kija aser kibong taküm yanglushitsüla. Kidangi meyipa arurtem asenoki pelashishia agizüktsüla" ta Alok Kumar-isa metetdaksü.

De Operettas Music Institute pur annual recital kaogo



Honibarnü RCEMPA nung De Operettas Music Institute Kohima pur tanabuba annual recital sentong agidang tangokba noksa ka nung kaketshir aser tesayurtem aser Ajeen Longchari Sucha-i o jembiba noksa ka yangi angur.

Kohima, Luchii/Dec. 19 (TYO): De Operettas Music Institute Kohima pur tanabuba annual recital sentong December 18, 2021 nü RCEMPA, Jotsoma nung agia iba reju indang 2021 session tembangogo.

Iba reju indang managing director Surhoveyi Tetseo-i ashiba agi, iba sentong nung kaketshir temi shilem tabu balala 27 agia liasü.

2021 session atema kaketshir 74 tenüng zülüoka liasü aser music teacher 10 liasü. Taruba session atema admission ya January 11 nungi tenzüka agitsü, ta pai ashi.

Iba sentong nung Master of music in Vocal Pedagogy, Ajeen Longchari Sucha ya alakteta jaoker liasü. Lai iba sentong nung jembiba mapang, tanurtemi küm tepiyong angazükba sempet amshitsü asoshi iba recital sentong ya sabang ka lir, ta ashi.

Kentener temi temolung lema shilem agitsü aser tesayurtemi sayuba lesson tem sayutsü asoshi ibai mapang lir, ta lai ashi.

Kaketshirtem tim lenmang nung anitetba atema lai reju nem tenüngsang agitsü aser iba reju nungi süngiang tajung atangba ngua ajungmesor, ta lai ashi.

Tarutsü anogotem nung iba reju maneni aintsü temolung lema lir, ta lai ashi.

Tesayurtem danga parnoki meranga inyakba nung süngiang atangba iba sentong nung sayur, saka yangji manentsüla, ta lai shia liasü.

Tesayur aser kaketshir aintsüji tongtipang lir, anungji ajaki maneni 'practice' asütsüla, koba nung tali tajungba kuma melenshitsu nungdaker. "Asen lima nung nendaka agütsür meranga inyakba kentener tajung nungdaker," ta Ajeen Longchari Sucha-i ashi.

Laisa kentener tem dang shidakba atema süoki ia bilemstü

ajungshia liasü aser iba atema lai parnok dang pei sasa ken zülutsü aser pei yimya nung ken meyipzüksü ajungshia liasü.

Küm ishika tsüngta Nagaland nung ken tsütsü temelenshi jenti aruogo, aser tang ya ken nung dangar jilu maji mejema atentsü mapang lir, ta lai ashi.

Kenteneri teti bilemtetsübaji 'ken ya shibai yanglu aser kechi atema? Ken ya Tsüngremi Pa sentsüwangshitsü aser nisungtemi Pa külemtü atema yanglu, ta lai ashi.

Anungji kenteneri ken ya Tsüngrem meyong ta metettsüla aser Pa sentsüwangshitsü atema asenoki amshitsüla, ta Sucha-i ashi.

Tanurtemi kechi ken atener aser kechi ken angar aji tsüraburtemi metettsüla. Ken ajabo tajung masü, ta lai ashi.

Iba sentong ya Avinuo Khoubve aser Vetho Ringa nati anir agia liasü.

CCCPO ajanga Nagaland sorkar dang pelar

Dimapur, Luchii/Dec. 19 (TYO): Nagaland sorkari Chümoukedima ya state nung district 15 buba ta sangdongba atema kanga pelar, ta Chümoukedima Circle Chakroma Public Organisation (CCCPO) ajanga sangdong ka nung ashi.

Iba ya ajanga sorkari timtem balala ajurua aliba nüburtem atema süoki ia bilemstüba kuli sayur, shirnok ajungben mapa asoshi district headquarters semdangtsü atema traffic nung timtem jenti ajurua liasü, ta ashi.

Tang aliba sorkar shisa akaba ya nüburtemi kanga meimer, kechiaser Chümoukedima district nung terenlok asoshi

tesem teladak tuluka lir. Aser tangatetba tajung aliba nüburtem aser lokti tentet balalai kanga yakyaka shilem agiba aser amalitepba ajanga district ya dangar asoshi tatishitsü tajung asütsü aser tarutsü mangdang yur renloka aotsü, ta ashi CCCPO ajanga ashi.

District nung tarutsü mapang ajak nung kin balala tsüngta yimjung aser tesunep nung alitsü stema tesendaktep tajung yur külemi inyaksü imla atar.

Onokia nüburtem sadoksayima aser tiptema alitsü asoshi mera ajak nung sorkar den yariteptsü molunga lir, ta CCCPO sangdong ajangasa ashi.

Elongshila Jamir-i züluba Serendipity kaket sayaogo



bongmanga aliba asangsang nung ataloka benjongtsü ya tepelatsü lir, ta lai ashi.

Inakali Assumi, Assistant Professor ajanga iba kaket asadanga indang lemsatepa liasü.

Serendipity yagi pei bilemba ochiba nung aser temonungratsü yimya nung temai adoka lemsateper, ta Assumi-i ashi.

Ibai nisung kati, talisa tetsür kati ajangshiba lir, temolungjang nung ainba, pei sasa pei agizüketba aser meimba indang lir. Ibai timtem ajangshiba, pei ayak bushiba ka lir.

Ibai takok anguba, tatidang ajangtetba aser pei jenjang bushitetba ka lir, ta lai ashi.

Teburtem tekolak sür aliba lokti ka nung tetsürtem amokbanga aliba indang sangro ajanga kanga junga sayur aser tetsürtem tang oset ka ama bilemba aser jembiba indanga sayur, aser sangru zülur molung nung bilemba tokzüka sayuba lir.

Iba kaket azüngertem temolung nung tesunepsüba angutsü imlar aser pei Serendipity zülutsü, azüngtsü aser atentsü tenzüksü asoshi kuli ka asütsü amanger, ta kaket zülur Elongshila Jamir-i ashi.

Iba sentong tenzüka Edward Odyuo, Secretary, The Lighthouse Church ajanga sarasadem aser Pastor Wabang Longchari, Founder & Director Sinai Ministry ajanga kaket meshiteta sarasademja liasü.

Teichüma Village Students' Union Hon jubilee mungogo



Kohima Smart City Development Limited (KSCDL) CEO, Er. Kezhazhou Theünoo den TVSU ketdangsurtem tangokba noksa ka yangi angur.

Kohima, Luchii/Dec. 19 (TYO): Teichüma Village Students' Union (TVSU) pur Hon jubilee sentong ka Honibarnü Teichüma Village nung agia liasü.

Iba sentong nung Kohima Smart City Development Limited (KSCDL) CEO, Kezhazhou Theünoo tesemdanger tongti ka ama arua moatsü.

Sentong nung kaketshir aser yimtsüng nung nüburtem den jembiba mapang, jubilee ya tatok agütsüba aser benjongba mapang ka asütsüla, ta Theünoo-i ashi. Küm 50 ajungba atema kaketshir den tepela lemsatepba mapang, pai parnok dang kaketshir ajangzüksü asoshi asa-lentong tasen nung tejakleni mera agia aotsü ayongzüka liasü.

Paisa state nung mapa manguba tebilemstü indang lemsatep, kechiaser Northeastern region nung mapa

mangur timtiba Nagaland nung lir.

2019-20 küm state nung zünger mapa mangur 15,800 tenüng zülüoka liasü aser taküm 1,00,000 ajangtsü imlar, ta pai ashi.

Sorkari lanurtem nem mapa inyaksü asoshi maongka balala agütsütsü sentong yangluba mapang zünger mapa inyaksü meteta aliba lanurtemi private sector nung maongka bushitsüla, ta pai ashi.

Sorkar mapa nung metaloker aliba ya tanaben reprangshitsüla aser tsüraburtemi pei chir dang private sector nung maongka bushitsü ajangshitsüla, ta pai ashi.

Sorkar mapa inyakertem shidakba nunga mapa meinyaki mesüra office-i moi itasen agizüka agir aika lir, aser sorkar mapa aginüba ajanga mapa inyaksü mejangratemi terelokba mesademi kumdaktsür, ta Theünoo-i ashi.

Paisa kaketshirtem dang tarutsü nung pe peria alitsü atema pei shisatsü tajungtiba nung amshitsü ayongzüka liasü.

Ananü jubilee benjongmung ya tesemdanger tongti-i jubilee nüngshilong ka sayatsür tenzüka liasü.

Iba mezüng sentong nung Kezhaletuo Metha menden liasü aser Organising Committee convenor, Vizokholie Mere Kesiyie-i tarur pela agizükba o jembia liasü.

Jubilee choir ajanga temeja ken ka aten aser TVSU tir Thejasetui Sogotsu-i tir o jembia liasü aser Organising Committee nung secretary, Dr. Vikuolie Mezhatu ajanga jubilee osang agütsü.

Iba sentong nung Angami Students' Union (ASU), Northern Angami Students' Union (NASU) aser Northern Angami area nungi kaketshir tentet balala arua dena liasü.



December 17, 2021 anogo nung Mopungchuket nung tebu tedi lenir Wb. Maongwati Aier (IAS Rtd) er jabaso tanubusang Nokentemjen Aier, USA nung Montana State University, Jake Jabs of Business & Entrepreneurship nungi 2021 küm Dean Award for Excellence, Marketing Option, konang agizüker, parnok Dean of University aser tetsü o tebu na den agiba noksa ka yangi angur. Pa nem iba konang ya iba university nung Major Marketing & Finance nung kanga junga graduate sütetba aser kaketshir rongnung tajungtiba jenjang ngutetba atema tenüngsang agütsüba "academic excellence award" liasü. Iba konang agütsüba sentong nung kaketshirtem ajak tenüng nung pai jembia liasü.

Piazza restaurant nem 'Best Regional Standalone Restaurant of the Year (Small Town)' award agütsü



Rajeev Barman (achiji), CEO, Burger King India aser Ritu Marya (abilen), editor & CEO, Franchisee India ket nungi Piazza Restaurant, Promoter, Vinay Chamaria (tiyong)-i award agizükba noksa nung angur.

Guwahati, December 19, 2021 (Agencies): Indian Restaurant Awards 2021 sentong nung Guwahati nung aliba Piazza restaurant nem Best Regional Standalone Restaurant of the Year (Small Town) - East sempet agütsü.

India kübok northern, southern, eastern, western aser central region ajunga nung kiojen junga yanglur aliba, chiyungtsü shitak agütsüba aser junga achaayangba asadanger sülen best standalone restaurant of the year (small town) category nung iba award agütsür.

December 17, 2021 nü New Delhi kübok Pullman, Aerocity nung 10buba Annual Indian Restaurant Congress Awards sentong agiba mapang, Rajeev Barman, CEO, Burger King, India aser Ritu Marya, editor

& CEO, Franchisee India nati Vinay Chamaria nem iba award agüja liasü.

Iba award agizükba mapang, Piazza Restaurant, Promoter, Vinay Chamaria-i, "Industry nung timtem tulu ajangshia aoba mapang onok dak temulung lemteta amalitepa inyakba atema adianutem/kibong züngsemtem, customer aser staff dang pelaba metetdaksür aser iba award parnok nem bendanga agütsür," ta ashi.

"Tarutsü nunga tang dang nungi tajungba inyaksü asoshi iba award ajanga onok tali ajangmesotsü," ta Chamaria-i ashi.

Taoba küm Guwahati Food Awards sentong nunga Piazza Restaurant nem 'Restaurant of the Year 2020' award agütsü.

"2019 küm kasa sentong -

Indian Restaurant Awards nung iba restaurant nem 'Italian Restaurant of the Year' naroküm agüja liasü," ta sangdong ka ajanga metetdaksü.

"Tawa, Piazza-i Rajwada ta nüngja agütsüba 'Dark kitchen' chiyongtsütem metetpeladakja liasü, koba Indian aser Rajasthani cuisine balala agütsür," ta kasa sangdong nung shia lir.

Restaurant Awards ya national awards lir, kong restaurant industry nung inyaker takotetem indang maparen balala jangjatetsü nükjidong nung iba award agütsür.

Tesüiba küm ishika nungi Franchisee India ajanga iba sentong ayongzüker aser iba sentong tenzüker külen nungi India nung restaurant lakh 1 dak temai shilem agiogo.

Meghalaya sorkari Dec. 23 tashi nung vaccine agütsü tuyur

Shillong, December 19, 2021 (Agencies): Meghalaya sorkari department balala nung mapa inyaker ajak dang December 23, 2021 tashi nung Covid-19 vaccine agütsü asoshi tetuyuba agütsüogo.

December 06, 2021 nü High Court-i awareness drive ayongzüksü aser nüburtem dang vaccine agütsü ajangshitsü asoshi asalentong takang yanglutsü atema sorkar nem tetuyuba agütsüba ama inyaka arur.

"Sorkar tenzüka wadang nung inyaker ajak, shirnok Covid-19 vaccine ajem magi lir, December 23, 2021 matongdang vaccine agiadoktsü asoshi tetuyuba agütsür" ta Meghalaya Chief Secretary, Rebecca Vanessa Suchiang-i metetdaksü.

"Iba dak sendakba nung medical kuli balala ajanga vaccine magitetsüsa kümra, District AEFI Committee, koba district ajunga nung tentetta lir,

Committee-i reprangshimtsü. Committee indang tetuyuba aser temelaba nung anidaka, pa/la vaccine magütsü asoshi telemtetba agütsütsü" ta laisa ashi.

Meghalaya nung state sorkar department ajaki iba osang sangdongba anogo nungi tenzüka Covid-19 inyakyim sülen anidaksü asoshi metetdakja lir.

December 06, 2021 nü Meghalaya High Court-i PIL angadangba mapang, "vaccination maparen dak sendakba nung, tesem kar nung ano vaccine ayimjema magütsü lir," ta ashi.

"Awareness drive sentong tem ayongzüksü aser vaccine magi alirtem dang vaccine agütsü ajangshitsü, kong parnok atema dang masü saka tangara iba wara nungi kümzüka ayutsü asoshi State-i asalentong meratem nung metsüngareta anidaksüla," High Court-i teyua liasü.



Tourists aser passengers-i asüngdangba ama Badarpur tashi "Vistadome" Guwahati-New Haflong Tourist Express (15888/15887) senzütsü atsülangogo. Assam nung vistadome coach sayaba sülen iba special tourist train ya kanga sapua jembiteper. December 22, 2021 nungi iba train ya Badarpur tashi senzütsü. (Guwahati, December 19)

Tripura-i jiru metric ton 40 shi Germany yok



Agartala, December 19, 2021 (Agencies): Tripura-i mozü mamshii tsünüba (organic) jiru metric ton 40 tashi Germany yokogo.

Tripura nungi yokba jirutem ya Hamburg, Germany shishilembaba tesem nung ayoktsü.

Unakoti district kübok Kumargahat nung, chief minister Biplab Deb-i item jiru indang mezüing shilem (first consignment) yoka liasü. Honibarnü CM Deb-i mezüing

shilem ya tzü lenmang ajanga yokogo.

Tripura horticulture department sangdong ajanga angazükba agi, 2007-08 küm NEERAMAC indang fruit concentration centre shibangba sülen, mozü mamshi tsünüba jiru ya tan mezüing bendangleni yoker asütsü.

"Nüburtemi kanga sapuba aser junga achaayangba ajanga item jiru, koba mezüingbo odang endok aser local market nunga jiru ka jenjang sen 2 majung

liasü, tang sen 15 aser 20 yong jiru ka ayoker," ta Tripura CM Biplab Deb-i ashi.

"Jiru lu semdanga aser repranga senzütsü mapang adokba atema pelar. Tripura sorkar teyari ajanga aluyimertemi pei lu nung züsentetba jirutem jenjang tajung agi yokteter," ta Deb-i shisem.

"2022 küm tashi nungbo aluyimertem sen aazükba maparen anasü agi timba kümtsütsü asoshi sorkar nükjidong lir," ta Deb-i ashi.

Manipur IRB candidate temi BJP mokdangtsü amokmerener

Guwahati, December 19, 2021 (Agencies): Manipur nung 10th aser 11th Indian Reserved Battalion (IRB) indang candidate temi tentetba Joint Action Committee (JAC)-i taruba Manipur Assembly election nung BJP mokdangtsü metetdaksüogo.

Election atema model code of conduct (MCC) mebenokdang recruitment test results mesangoktsüra BJP mokdangtsü ta JAC-i ashi.

"Tesüiba küm aika zünger mapa manguba lanur aikati education, water supply, power, veterinary department tem nung job interview agütsüogo" ta 10th & 11th IRB riflemen 2019 batch indang JAC nung secretary Keithelakpam Naoba-i ashi.

"State senpong tazüing lir

aser itasan magütsütetsü asüba agi riflemen meshimok" ta taoba police ketdangsur Brinda Thounaojam-i shiogo.

"IRB ya tetuyuba sülen anidakba force ka lir. Iba jagi candidate kari anir lungkak aitba atema parnok mapa nungi shimokba sülen disciplinary action agütsü akok" ta Manipur Chief Minister N Biren-i tawa tu metetdaksüogo.

Mapang talangka Home Minister temi police aser paramilitary personnel nung nübo peria meliaka nisung meshimokteti arur.

Candidate aikati department balala nung mapa bushir saka sorkari tebilemstü mabenba ajanga candidate tem temolung yirutsür, ta JAC secretary Keithelakpam-isa ashi.



TIR YIMYIM YIMOBILEM (EDITORIAL)

DIMAPUR TENTONÜ, LUCHII (DECEMBER) 20, 2021

Districts ajanga tajangzük

Nagaland ya alinük tilaka aser nütsünga tangar yimti mepu ka nung aliba nütsünga madoksa, saka state government nung yimsüsürtemi nübortemi aginüba angateta, parnok lenjii oagi mapang tatsüka tsüngda akhidang district asem aliba nungi tangbo joko district 15 kuma yanglutsüogo. Talisa, tan Nagaland nung district tasen asem Tseminyu, Niuland aser Chümoukedima kümstüba ajanga Dimapur district headquarters office belentsüba dak sendakba nung Dimapur town aser temeket nung alirtem o Chümoukedima nung alirtem na tsüngda tatsütep adoka aliba, shinga makoksadaksüi tesünep nung bendangtsüogo. Government-i district ka anepalutsüba maparen nung kiojen aser ketdangsertem ajak shitak yutettsüsa senotsü bushiteta anepalutetra, district tilala kuma aika lemsar ketdangsubajisa tajungba, kechiyong idangjibo nübortem o district administration na tsüngda len talang mejajai tongteprateptsü anameta kümer melamelar asütsü. District akümba nükjidongji government-i nübortem alidak bushia oagi parnok nüngdak inyaksütsü asoshi ketdangsertem yokba sentong lir, anungji district talila ka kümli Nagaland topur tajungba, tesünepba aser takarba kümli ta asütsü tim. Ajisüaka, tanü asen Nagaland tia repringdangra, bilemba amato masü, district tasen akümba agi kecha balaka terenlok mapa inyaka aoba mangur. Tanü Nagaland nung akabatem ya teimbaka state kümli district asem asüba mapang yangluba lenmang aser kiojentem dang lir. Iba sülen district tenet aküm, ti aküm aser terana aküm ta district dang teimba aküm ashi, Nagaland nung district kecha nunga government school-tem tajungba akümba agi tsürabur aser tanurtem na prongla anisüngzük anguba, district mozü kitem tajungba akümba agi sensakertem sen meindok sentsüh matsüh taneptsü anguba, district tali tali akümba ajanga electric light peria anguba agi tesangwa dang masü saka lanurtemi electric tashi amshia peisasa mapa tapu balala tenzüka aoba aser district tasen aküm metetmeteta, gari lenmang tesadem aser tajung nung senotsü meindoki nübortem nüngdak jet jet ta oli aruli ta jajatettsüsa terenlok mapa anepalutsübabo kangabo mangur. Aji oda, nübortem alidak tesemtemjibo toktsür district nung Deputy Commissioner aliba kima dena lishitsüng, motzü aser auyi agi Nagaland dena mera maket kümdaktsütsüsa asenoki angutsü. District balaka akümba ya Deputy Commissioner alidak aser mapa inyakdak ki tasen balaka yanglur, yangji inyakterem kar ita sen chia alitsü atema shimer nübortem nüngdakba certificate-tem agütsütsü asoshi akümba dangbo masü, saka Deputy Commssioner-ji government tenüng nung district nung aliba department-tem ajak madak kibur kümer repringtsü asoshi tashi agütsür yokba tongti ketdangser ka lir. Aji oda, district akümba tetezüji district nung akaba government department ajak shitak arakzüka inyakdaktsütsü atema tanüker aser terepranger nisung ka Deputy Commissioner-i anir department ajak nung ketdangsertem yoker. Ibaji nübortem alidak government tonga aruagi yaritepba tamaitü lir, anungji district shia nung tereprangtsü nunga government mali amato masütsü tim. District-bo aküm saka nübortem tangutsü tim mangur ta süra district akümba ajanga government senotsü endokbaji dang amajok asütsü. Iba amaji mataloktsü atema distric shia nung terenlok mapa inyaksü asoshi department shia nungi senotsü yokba dak alaka ano District Planning and Develoment Board ajanga assembly constituency shia nung terenlok mapa inyaksü asoshi senotsü balaka lemzüksür, anungji district akümba tajangzükji aji ka asütsü. Ajisüaka, district nung terenlok mapa inyakba ajak tiyazü bill yanglur agidaktsü nungbo, district akümba agi ajangazüktsü melen nübortembo takoksa madak takoksa angutsü . Aji oda, tang amai district tasen tasen kuma aoba ya talidak address balaka amshitsü asoshi dang masü, saka gari lenmang tajung akaba, taneptsü shitak anguba government mozü ki akaba, kaketshisatsü tajung shitak anguba kaketreju alidak, light shitak arua mapa inyaktetba district asütsü tim. Iba amaji ka asenoki meinyaktetra, government senotsü amajok nung meindoktsü atema, ano, tarutsü nungbo district anasemka dang ayutsüsa akümstü. Asenoki angatettsüba kaji, alima ya district aika akümba agi renloker masü saka lenirtem dak ochi aser terenlok mapa inyaka aotsü shisatsü (idea) ali nung dang renloktsü. Iba tangatetba nung asenokbo district tali akümba nung ya masü saka shisa tajung tali bendena inyaktetba lenir aser nübor asütsü merangdi.

OLEMSABANG

Arogo aser Lokti nung Mokokminertem Jenjang

~ Maong Jamir

Yanglushidi Sensaksem Sabang (YSS) nung talila tangazükba jenti angu nung temalen ni züluba, Shiba Aitsütsü, kaket nung "Arogo nung matamabensartem jenjang" aser 'Lokti nung Matamabensartem jenjang' ta sür ocet zülü. YSS nung tangazükba tasen jenti angazük nung itemji kar enoksemer iba ocet zülü.

Ao oshi nung jaja moteter, tenük majung mesüra tenük tapok, tenarong agi mangashir, tekolok meshitak, teka maketer, o mashir, tejak aser temang tereprangtsü tangar dang nungi balaka alirtem ajak dang 'matamabensartem' mesüra 'tangar memenepertem' ta ajar. Engraji nung 'Disabled', 'handicapped' aser 'impaired' ta amshir.

Engraji oshi nung 'disabled' ta süra asen Ao oshi nung 'mokoktetba' mesüra 'meinyaktetba' ta ajatsü akok. Impairment ta süra pa/la temang nung shilem ka agi mabensaba mesüra timtem kar aliba aser handicapped ta süra pa/la meküta aliba purtemi osetba, inyaktetba pa temang nung mabensaba ajanga meinyaktetba ta meyiptsü akok.

Asenok Ao oshi nung matamabensar, yimer memenepba nisung ta ajar. Saka item olongtem nungji nisung ka jenjang kanga nema lua mesüra ajema kümdaktsür aser parnokia magizükteter. Kechiba süra parnok karibo tabensar den tali mapa tajung inyaktettsü tekolok lir aser yamaji inyakba angur. Iba yongji Mapula Lemtor-i "Mokokmein" ta asüba ya tapetba lir kechiba süra iba yagi mokokmein tapu aika ayimjemer, aser parnokia agizükteter. Kechi agi mokokmeiner? Parnok tenarong agi mangashir, tenük agi mangur, tetsüng agi jaja moteter, aser pa/la shi azü aser tekolok tashimait, a.a., saka iba jagi parnokji iba jagi jenjang tajemba mekümdaktsür.

Asenoki 'matamabensartem' mesüra 'tangar memenepertem' ta ajaritemi tanü putu nung anema alir mesüra temang shitak alirtemi mokoktetba mapa aika kokteter. Anungji parnok dang "differently abled people" karibo ajar. Kechiba süra asenoki mamangtetsüka yimya balaka ajanga anema alirtemi inyakba mapatem ajak inyakteter. Alima otsütemji zündangra asenoki item ama 'mokokminertem' asenok tabensabapurtem ajangteta inyakba aika lir. Saka Tsüngremi meimchir ajak nem sempet balala agüja ali nung iba ojang yaa sapua mamshir.

Lokti nung mokokminertem jenjang

Tanü kibong kar nung tanur kar tera meshitak ama sora, lokti par kibongji atakatem kibong ama züngshir aser aiben tetsü-tebu menen, tsüraburi aibelenba menen ajanga ta obendang dang agütsür aser sentoka toktsür. Iba yongji asen lima item tanurtem jenjang maka akümer aser parnok sempettem lokti nung mamshiteter.

Tanü asen lima nung item ama tanur soteter kibongtemi item tanurtem yimya balala nung amshir. Kibong kar nung item tanurtem sotetba ya atakatem tulu ama bilemer aser tangar dang mesayutsü asoshi takdang telung nung shibanga ayur aser akümüli tepiyong aiatai tia nung alima tebor tajung mesayui toktsür. Kibong kar nungbo parnokji room nung shibanga yutsür, karbo yinzü agi alena yutsür. Ano kibong kar nungbo item tanurtemji schooli meyoker aser kidang kilir/alar ka ama amshir. Kibong kar nung ano tali anepalur aser tsürabur dak arishi tepiyong metaloker lidaktsür (dependent).

Item tanurtem ya Tsüngremi yangluba. Osangtajung Yohan 9 nung Yisu nütsüngtemi nükpoker ka indang Yisu dang pa tenük apokba ya shiba tai ajanga ta asüngdangba angur. Yisui langzü "Iba nisungi süshia, pa tsüraburi süshia temenen mebenshi: joko pa dak Tsüngrem sentsüwangshi jungkai adokdaktsütsü asoshi..."pa tenük tapok aso. Item shi nung mokokminer purtem dak sempet aika lir. Asenoki meimlaba mapa jenti parnoki inyaksü akok. Item mapatem ajanga Tsüngrem tashi tali jungkai adoktsür. Saka, asen lima nung item tanurtem ya tagidak maka ama bilemer aser sentoka toktsür.

Kibong aika nung tsürabur shisabuluj: "ni sür shibai pa/la repringtsü?" Tsürabur karibo ni masüdang pa tama südaktsünüali ta jembir. Anungji iba shisabulu nungi anentsü asoshi tsüraburtemi item tanur ya teküratiba nung teyari leman balala bushia yaritsü nungdaker. Iba denji lokti aser Arogoia nungittsüla.

Ashiko shi temang nung mokokmin keter asobaji melenshitsü mesüra yanglushitsü makoktsüa akok. Saka pa/laji sowar (fool) ka ama meblemstüla. Pa/la temai adokdaktsüba ajanga, pa/la tarutsü nung tsürabur dak memetaloki litettsüsa sayutettsü mesüra angazüktsüa akok. Chinese nunger shin o nung yamai shia lir. "Nai nisung ka nem ango (fish) ka agütsüra pa kenü asoshi chiyungtsü peritsü, saka nai pa dang angu aputsü sayura pa akümüli tepiyong achitsü". Tanü mokokminertem kodasür parnok sasa ayangaa taküm alitsü iba leman par sempet dak apet sayutsüla. Iba nung tsürabur aser lokti teinyaktsü jenti lir ta angatettsüla. Tanur karbo kodanga mesayutettsüba jenjang nung lir aser parnokji jenjang balaka. Saka mokokmin keter asoba tanur ajak kasa masü. Tanga lima nung mokokmin keter asoba purtem nungtugu kümtetra, asen jala/jabasotem mekümtettsü na? Atangji kümtettsü.

Tanü lokti nung teblemstütem ya nisungbaji masü saka lokti tashi maitba ajanga item teblemstütem tali ulua kümdaktsür. Lokti nung aliba metok mepiriba purtem anitettsü asoshi parnok centre ka nung oa toktsüba ajanga dangbo temelenshi kangabo mangur; kechiba süra asen lokti tangatetba memelenshi tashi parnok tatongokdak maka aser angazükbaaji amajok akümer. Anungji tanü lokti tangatetba melenshia parnok lokti nung arok tagidak akaba nisung kaka ama amshiba ajanga dang terenlok tuluba angutsü.

Anungji item tanurtem anitettsü asoshi tsüraburtem khuret dang masü saka lokti nung ajaki shilem agitsü nungdaker. Tsüraburtemi item tanurtem sayutettsü merangaka, lokti-i parnokji mezüngokra ajakji amajok. Anungji lokti-i parnok ya atakatem chir ka ama masü saka 'Tsüngrem Chir Pa sentsüwangshi asoshi yanglu' ta bilema amshitsüla. Tanabuba nung, lokti balala nung parnok nem shilem agütsütsüla aser parnok arua tentettsüsa leman satema lapoktsütsüla.

Tanü alima ajak nung government aser lokti balalai item nüburtem anitettsü asoshi asameyang tajung yanglua inyaker. Anungji asen sasep nung lokti ajaki item nüburtem mesendoki tapet teyari agütsütsü nungdaker. Iba mapa ajanga kenü anogo asenoki mokokminer ta mesüra 'mabensabapur' ta züngshiba purtemi asen nüburtem nem tajangzük tulu agütsütsü, aser ibaji ajanga Tsüngrem tenüng tali sentsüwangshitsü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

Kentucky nung Tenla kidang Kibuba Benjung langbang dang meraksa



December 19, 2021: December 10, 2021 nü Kentucky kübok Mayfield nung yipru mopung lendong tulu atalokdang First Christian Arogo Tenla ki mejungi raksa saka iba Tenla kidang aliba Kibuba Benjung langbang dang meraksa.

Iba yipru mopung lendong nung ki aika chirepa liasü aser item rongnung Mayfield Consumer Products candle factory densema lir.

First Christian Arogo nung pastor, Milton West-i, iba yipru ajanga Arogo Tenla ki kanga mejungi raksatsüogo saka Kibuba Benjung langbang aser Kangki dang meraksa, ta metetdaksü.

West-i facebook ajanga, "Ozü Arogo nung Kibuba benjung agiba langbang dang meraksa, aser iba langbang ya tekülem sentong nung tongtibangba liasü," ta metetdaksü.

Iba lendong nung par Arogo nung züngsem shinga masü saka kibo aika raksaogo.

West-i Arogo züngsemtem danga, Tenla kiji tanaben yanglushitsüsa akümtsü, ajisüaka Tenla ki raksaba ya temaitsü tamajung ka ama mezüngshitsüla, ta metetdaksü.

"Nisung aikati, iba ya Tsüngrem nungi temaitsü tamajung ka, mesüra langka meshidak, ta jembitsüa akok, ajisüaka onokibo yamaji khenyongi mebilemer. Asen tamang akhanga lir aser nüburtem taküm nung tamajung atalokbaji Tsüngrem ajanga masü," ta pastor-i ashi.

West-isa, "Lendong aser timtem mapang nung tamangertem longjemdaksür. Asenoki jashir, ajeper aser azüteper aser longjemer Arogo ka ama asentenshitsü atema mera agia inyaker," ta ashi.

"Ajak ajungtsü atema iba ya ajanga asenok nem maongka agütsür. Tanaben taküm asentenshitsü merangba mapang nung tebilemba balala aika liaka ibaji mesükshir," ta pai ashi.

Yipru lendong atalokba sülen nungi First Christian Arogoi Tenla ki raksaba kima moapu nung tekülem sentong agia arudar.

Brihostibarnü First Christian Arogoi, taruba Amongnübo Mayfield Elementary School nung tekülem sentong agitsü, "Asen Arogo taküm lir" ta metetdakja liasü.

Yipru lendong atalokdang Mayfield First United Methodist Arogo nung pastor, Rev. Joey

Reed aser pa kinüngtsü nata Arogo Tenla kidang jenoka liasü. Yipru süngjamba sülen ang tena meketa kiojen ajak chireper aliba tenati angu.

Hokolbar aonung nungi Honibarnep tashi nung yipru mopung agi Kentucky pezüben kongshia liasü aser iba lendong nung nisung 74 asüba den nisung 100 dak tema sama.

ANOGO ABEN TSÜNGREM DEN

Taküm alidang ilonga inyakdi

"Kechisa ne ket agi inyaktsü ajurudir, nai inyakang; kechiaser na aolen asüyim nung mapa mesüra tebilemtsü mesüra temetetba aser shisatsü kecha mali." Sayutsüngri 9:10

Sayutsüngiri ashir meimchir ka taküm ali tashi alima nung shilem lir. Taküm alidang sentong yanglur aser mapa küma inyaker. Tenzükba, yariba, yangluba, nükshiba, aria bilemba kodang taküm tembangdir item shilem kecha meli kümatoker.

Anungji temang anema aliba mapang kechi mapa inyaktsü, yariteptsü aser tenzüksü ajak ilonga inyaktsüla kechiyong tangu sashiaka tenüki mengui kümra, tenarongi mangashira, mejembitetra aser marakzüteti kümra bilemaka kecha meinyaktsettsü. Koda masüba tiai memenepdang mapang tajung ajak alangzükatoktsüla. Mapang alangzükba rongnung tongtibangtibaji asen tanela tekümtet jangjaba ya lir. Taküm alidang alima wadang takok ngua inyakba den tekümtet kurang semer Tsüngrem den metangdangi jajadi.

Sarasadem:

Oba Tsüngrem taküm arishi kanga tatsü süaka alima wadang inyakdang na sentsüwangshi sütettsüsa nai ni yariangma. Amen

Laishiba küm ka nung: Isaia 14-16, J Adok 7, T Ken 23

Covid ajanga Bangladesh nung Arogotem timtemer

December 19, 2021: Bangladesh nung coronavirus wara mapang nung Tenla kitem shibangba ajanga Tenla aruba lenmang ajak anenogo, aser ibaji ajanga Arogotem kanga timtemdar; Arogotem ket nung sen peria maliba agi Arogoi bilemba ama timtemertem meyariteter.

Tang Bangladesh nung coronavirus wave tasembuba ya tamajungba, kechiyong Delta variant ajanga shirangertem aika kümogo aser iba tashidak agi shiranger aika südar.

Tang Bangladesh nung yimtsüngtem nunga nisung aika dak iba tashidak puteter saka hospital nung yipten peria maliba den oxygen aser medical staff peria mali.

December 19, 2021 nungi tenzükba Bangladesh yimtiba, Dhaka kübok Mohakhali area

nung aliba Bangladesh College of Physicians & Surgeons (BCPS) nung covid booster dose agütsü tenzükogo.

Doctors, nurses aser health workers nem tama iba booster dose agütsütsü, iba sülen teintet sentotem nem agütsütsü.

December 12 nü National Technical Advisory Committee (NTAC)-i arrshi küm 60 ser temapurtem aser frontline workers nem booster dose agütsütsü benoka liasü.

Khulna Arogo nung health commission secretary, putir Bablu Lawrence Sarker-i, "Onoki nisungtem dang kidang nungi mayazüktsü aser maneni sarasademtsü ajungshir. Nisung aika chiyungtsü peria mali. Anogo nung aseben chiyungtsüsa chiyungtsü peria mali, saka Arogotemi akokba tashi parnok yaritsü merangdar.

Iba tensa ya kanga majung, aser Khristan kibongtem aika nung iba tashidak agi shirangertem lir," ta metetdaksü.

Paisa, Arogoi tanela chiyungtsü agütsüba densema tenzükba mapa aika anenogo, ta metetdaksü.

Catholic Khristan lanurtemi nüburtem den yaritepa vaccine agitsü aser vaccination centres-i aotsü atema tenung züludaksür, ta pai ashi.

Coronavirus mezüng prokba mapang nungbo Khristan telok balalai emergency support services agüja liasü, saka tangbo rongsen peria maiba agi yamaji meinyakteter.

December 18, 2021 anogo tashi nung Bangladesh nung nisung 15,80, 872 dak coronavirus putetogo aser iba tashidak agi shiranger 28,047 süogo.



Discipleship Bible College , Mount Miracles, Dimapur nung laishirtem Christmas Ken toktepba sentong nung shilem agirtem angur. (Dimapur, December 19,2021.)



December 19, 2021 nü Bengaluru kübok Belagavi nung trade unions balala nungi züngsemtemi anti-labour agienang aser petrol den diesel jenjang ajemang ta takhangba agüja longkak aitba noksa nung angur.

Tanü Lok Sabha nung Election Laws Amendment Bill benoktsü

New Delhi, December 19 (Agencies): Hombarnü Lok Sabha nung election dak sendakba inyakyim aika melenshitsu atema bill tasen ka benoktsü.

Election Laws (Amendment) Bill, 2021 ya ajanga vote agütsütsü atema tenüng agütsürtem dang Aadhaar number meshitsu atema electoral registration officers nem temelaba agütsütsü.

Kasa bill ajangasa, nisung ka maitsü jangjatsü, nisung ka tenüng constituency ka nung aiben züluoka aliba mesüra constituency balala nung kasa tenüng züluoka aliba mita reprangtsü atema tang electoral roll nung alirtem danga Aadhaar number meshitsu asoshi

electoral registration officers nem temelaba agütsütsü.

Kasa amendment bill ajangasa electoral roll nung tenüng züluoktsü atema mepishiba ajak agizüktsü aser nisung kati Aadhaar number magütsüeteba ajanga electoral roll nung aliba tenüng indoktsü memelatsü.

Aadhaar number magütsüetertemi tanga kuli kaketter agütsütsü akok.

Iba bill tasenba nung Representation of the People Act, 1950 aser 1951 kübok ozüngtem aika tanaben yanglushitsu.

Iba bill kübok Statement of Objects & Reasons nung shia aliba agi, RP Act, 1950 kübok Arrla 23 yanglushitsu, koba ajanga electoral roll data aser

Aadhaar ecosystem sendakteptsü, aser ibaji nisung ka tenüng tesem balala nung electoral roll nung züluokba nokdangtsü atema lir.

Iba bill kübok January 1 nü arrshi küm 18 ajungertem mesüra iba jakdang arrshi küm 18 ajungertem electoral roll nung tenüng züluoktsü akok, January 1 sülen ang arrshi küm 18 ajungertembo electoral roll nung tenüng züluoktsü atema ano küm pa piyong atatsüsa akümtüsü.

"Electoral roll nung tenüng züluoktsü atema tang nungibo January mezüngbuba anogo, April 1, July 1 aser October 1 anogotemji temsüa aliba anogotem asütsü," ta osang ka ajanga metetdaktüsü.

RSS ya sorkar remote control ka masü: Mohan Bhagwat

Dharamshala, December 19 (Agencies): Rashtriya Swayamsevak Sangh (RSS) tongti lenir, Mohan Bhagwat-i, RSS ya Centre sorkar remote control ka masü, ta metetdaktüsü.

Dharamshala nung ex-servicemen sentong ka nung jembidang Bhagwat-i, "Parnok executives, mapatong aser inyakyim balala lir. Tangatetbatem aser sobalibaji RSS indang lir. Mapa inyaker tongtitemji yangji (sorkar) lir aser parnok Sangh nungi lir, aser

maneni alitsü. Iba ama tesendaktep mali aser osangbenertemi ashiba ama 'Direct Remote Control' mali," ta metetdaktüsü.

Kasa sentong nung Bhagwat-i Chief of Defence Staff (CDS) General Bipin Rawat, pa kinüngtsü aser armed forces 12 Tamil Nadu kübok Coonoor nung chopper tsükokba lendong nung asüba atema mangyim jashi lemsatepba den külemi asürtem nem minute ka akhüm agüja liasü.

Bhagwat-isa, "Sorkartemi

onok anema nokdak. Mapang shia onok anema nokdakertem lir. Sangh teloki tetsükdaktüsü ajak kokteta küm 96 jungogo, ibayongji temelungertem aika renema dang lir aser parnoki ola madoki malitsü. Loktiliba nung nüngdakba mapang ajak nung parnoki yaritsü," ta metetdaktüsü.

RSS-i maneni lokti atema inyaker, saka yimjak nung ibaji mesayur; Sangh-i rongsenkettsüng mesüra sorkar teyari magii lokti tenzüker, ta paisa shisem.

Ola balala adokba party tem ka küma longjemtsü: Shashi Tharoor

Kolkata, December 19 (Agencies): Congress lenir tain aser MP, Shashi Tharoor-i, Congress anema ola adokba opposition party tem ka küma longjemtsü, kechiyong BJP tamakok ngudaktsütsüji ajak nükjidong lir, ta metetdaktüsü.

Taoba mapang Union Minister, Tharoor-i Centre nung BJP-i aniba NDA sorkari Good Governance Week amongtsü atema telemeteba agiba asoshia sorkar aitsü.

"Tesüiba küm tenet nung 'good governance' maliasü, kechiyong yimyim ayimba aser temaitsü sayuba politics agi 'good governance' melenadokogo," ta pai ashi.

Tharoor-i züluba kaketer, 'Pride, Prejudice and Punditry' sayaba sentong nung jembidang pai, "Tang linük nung o sadoka jembiba nokdang," ta ashi.

Honibarnü Kolkata nung Shashi Tharoor-i züluba kaketer tasenba sayaba sentong ya Prabha Khaitan Foundation-i ayongzüka liasü.

"Yimtenren nungbo hopta kaja mapang talangka. Anungji taruba Lok Sabha election agitsü atema ano küm ana ser tesadang anünga lir. BJP tamakok ngudaktsütsü atema

tang ola balala adokertem ajak ka küma longjemtsü, ta onoki imlar. Iba nükjidong ya BJP tamakok ngudaktsütsü atema dang masü saka parnok indang mapatongtem aser politics tamakok ngudaktsütsü atema lir," ta paisa metetdaktüsü.

BJP anema meraratetba atema TMC densema opposition party aikati Congress aitsüdar, aser iba dak sendakba nung Tharoor-i iba o ya jembio.

Tharoor-isa, "Iba sorkar den ni timtem ajangshibaji- küm ka nung hopta 52 'good governance' mali. Anungji hopta ka dang 'good governance' aliba jagi meperir. Parnoki khen atema dang masü saka küm piyong junga tenzüksüla," ta ashi.

Hombar nungi tenzüka Good Governance Week nung Centre sorkari linük tesem ajaklen, talisa yimtsüngtem nung campaign agia nüburtem timtem onük balala angadangtsü aser nüburtem tajungba tenzüksü.

December 20 nungi December 25 tashi Good Governance Week amongtsü atema Ministry of personnel, public grievances & pensions-i sentong aika renemogo.



December 19, 2021 nü Kolkata nung Municipal Corporation (KMC) elections agidang West Bengal Angh, Jagdeep Dhankhar aser pa kinüngtsü, Sudesh Dhankhar nati vote agütsüba temaitsü sayuba noksa nung angur.

Afghan nunger yaritsü atema lenmang bushitsüla: S Jaishankar

New Delhi, December 19 (Agencies): India aser Central Asia linüktemi Afghanistan den tesendaktep tajung ayur, ta metetdakja Amongnü India External Affairs Minister (EAM), S Jaishankar-i tang Afghanistan linük nung nüburtemi timtem balala ajangshiba atema tebilemtsü akaba lemsatep den külemi iba linük nungji minorities temeden kümzüka ayutsü atema ayongzüker.

India-Central Asia Dialogue tasembuba senden ya züngsem linüktem tsüngda shishilembaba, connectivity aser terenlok tsütsü taliba amalitepa inyaktüsü nükjidong nung agir.

Iba senden nungsa Turkmenistan, Kazakhstan, Tajikistan, Kyrgyzstan aser Uzbekistan nungi Foreign Minister temi shilem agi. Kasa senden nungsa tang Afghanistan nung meimchir dak sendakba timtem aika aliba atema jembio.

Tang agi tasembubaba India-Central Asia Dialogue senden nung okila jembidang Jaishankar-i, "Iba linük (Afghanistan) atema onok nükjidong aser tebilemtsü onüktemji kasa dang. Yangji ajak dendaktsüba sorkar ka alitsüla, kiralongra aser temesepaba mozü shibelenba anema raratsüla, tetsükdaktüsü kecha makai teyari agütsütsüla aser tetsür tanurtem den minorities temeden kümzüka ayutsüla," ta metetdaktüsü.

Jaishankar-isa, "Afghanistan nung alirtem yaritsü atema asenoki lenmang bushitsüla," ta paisa ayongzüker.

Taküm August ita nung Taliban teloki Afghanistan linük atsünga agi aser sorkar akümba mapang nungi tenzüka Jaishankar-i foreign ministers aika ajurua Afghanistan dak sendakba tebilemtsü onük balala lemsatepa arur.



December 19, 2021 nü Pune nung Union Home Minister, Amit Shah-i Central Forensic Science Laboratory campus semzüksüdag tangokba noksa nung angur.



Central Philippines nung aliba Cebu province kübok Talisay tesem nung Typhoon Rai ajanga laodaktsür aliba süngtong ka nung süoshi anü nung akongtsü yua aliba ajanga tetsür ka jaja aoba noksa nung angur. Yipru tesashi kati iba yimtsü nung kongshia süngtong laodaktsü aser power raksaja yimtsü nung balala nung alir nisung 300,000 shi tesem balalai jena ao.

Malaysia nung tzümetsü agi nisung 21,000 shi tim atemer

Kuala Lumpur, Luchii/Dec. 19 (Agencies): Malaysia nung tzünglu kanga sashia aruba ajanga tzümetsü adokba sülen nisung meyirijang aika pei ki yutsür tesem balala nung prokshia lir, ta state news agency Bernama-i ashi.

Tzümetsü agi tesüsa Deobarnü kongshiba state ji Perak ya alitsü, aser danga state trok nung tensa tamajungba akumer, anungji nisung 21,000 shi relief centre tem nung anidena lir.

Hokulbarnepe nungi tenzüka aruba tzünglu ya teti yimya nung ita ka aruba den sako lir, ta Ato Kilonser Ismail Sabri Yaakob-i Honibarnü menur osangbener senden ka nung ashi.

Tzümetsü agi kongshir alir

nem tekeratiba nung teyari agütsütsü ta ato kilonseri nangzük aser ki-o-jen raksar aliba yanglushitsü asoshi tang atema sen 100 million ringgit (\$23.7 million) lemzüktü.

Gari aser pei ki alema orr dangalen sabanga alirtem kumzüka maparen tenzüko aser kidang sabanga alirtem tebilemtsü koktetogo, ta Honibarnü osangtem ajanga ashir, ta pai ashi.

Police, army aser fire department nungi nisung 66,000 dak tema yoka lir.

Linük tesem ajungalen tzünglu aruba ajema kumaka Deobarnü nikongdang central aser northeastern state trok nung tzü lendong aliba jenjang alema metsünga lir, ta sorkar

indang website ajanga sayu.

Perak nung tzünglu ya lendong keta maneni arutsü saka Selangor nungbo lendong aketba level nungi ajema kumogo, ta Meteorological Department ajanga ashi.

Malaysia yimtiba, Kuala Lumpur telungzük aser temeket nung bus lenmang aika shibanga lir aser rongnendak yimti, Klang leni aoba train service tem anena lir.

Selangor nung aliba water treatment plant asem nung tzümetsü agi timtem agüja iba state aser linük yimtiba nung tajemtsü tzü akongtsü imlar.

Malaysia nung tzümetsü tesashitiba ya 2014 kum adoka nisung 118,000 pei ki yutsür jena aotsüsa akum.

Israel military-i Palestiniane nunger pezü apu

Jerusalem, Luchii/December 19 (Agencies): Brestobarnü West Bank nung Jewish seminary kaketshirtem mena aliba gari ka amakba nung densema alitsü ta temulung melemi bilemba Palestine nunger pezü Deobarnü Israel military-i West Bank nung puogo.

Homesh anasa iba lendong nung arishi kum 25 tain Yehuda Dimentman kaset aser tangar ana yirua liasü, koba Israel sorkari ozüng alema inyakba maparen ka ta züngshir.

Army sangdong ka ajanga ashiba agi, nisung pezü ya Jenin anasa Silat al-Haaretia yimtsü nung apu aser ken o maneni bushisüngdangtsü atema security force nem bendanga agütsüogo aser gari amak dang amshiba prangbong aser hadir balala dena puogo.

Israel ketdangsurtemi item nisungtem indang maitsü

memetdaktüsü. Israeli border police-i, temulung melemi bilemrtemi amshiba prangbong aser injangtem indang noksa ka sayaogo.

Israel Ato Kilonser Naftali Bennett-i item nisungtem apuba atema security forces nem tenüngsang agütsüba den kiralongrar ajaki Israel-i mang ayangtsü ta meteta alitsüla ta ashi.

Israel aser Palestine na hopta ishika mangatetep adoka aruba mapang ka nung iba lendong ataloka liasü. Iba ita tetenzüklen Palestine nunger kati Jerusalem yimti tejenba nung nisung ka dak kotari agi tsünga kanga mejungi yirutsü. Iba masüdag Hamas telungpurtemi yimti tejenba nungsa Israel nunger ka kaset.

Kasa mapang nung West Bank anütok tiplen Palestine nunger anema maparen balala inyaksangshia arudar.

Christmas mapang Netherlands mokdanga ayur

Hague, Luchii/December 19 (Agencies): Covid-19 Omicron variant menatapa aoba nokdangtsü atema Christmas mapang Netherlands mokdanga ayutsü, ta Dutch Ato Kilonser Mark Rutte-i Honibarnü metetdaktüsü.

Non-essential dokan, restaurant, bar, cinema, museum aser theatre tem ajak Deobarnü nungi January 14 tashi shibanga atatsü aser school tem January 9 nü tashi shibangtsü, ta Rutte-i ashi. Nüburtem nem kidang tesemdang anana anioktsü temelaba agütsür lir aser Christmas Eve, Christmas

anogo, December 26 aser kum tasen benjung amungba mapang tesemdang pezüzü anioktsü temelaba agütsüogo.

Netherlands nung Omicron variant yagi yakta Delta variant ajatetsü, ta Dutch outbreak management team tekolakba Jaap van Dissel-i ashi.

"Christmas aser kum tasenbai ayaoka aiba mapang tashi nung Omicron variant timba akümtsü," ta Dissel-i osangbenertem dang ashi.

Scientist temi, Delta ama Omicron-ia timtem agütsüra 2020 kum tetenzüklen dang nungi nisungtem timba mozüki nung temang anepalutsüsa akümtsü, ta tekümdangtsü metetdaktüsügo.

"Iba variant yagi taoba mapang tashidak menaba sülen defence kümteter aliba mesera vaccine agir aliba dena kokteter ta meteta lir," ta pai ashi.

Cabinet jongdak senden ka amenba aser sorkari taoba mapang tetuyuba agütsür aliba atsülangshija school tem jelia soti agütsütsü sangdongba sülen anogo pezü lir Rutte-i iba osang metetdaktüsügo.

Tetuyuba tasen agütsüba sülen Honibarnü nüburtem aika Christmas atema shishitsü asoshi nongtepa liasü.

Rutte-isa, benjung mapang iba tenokdangba agütsüba ajanga nüburtem ajak tezüdangtepba angateter ta ashi. "Netherlands ajunga tezü tangtepba ni angashir. Christmas atongtsü hopta ka dang lia iba tetuyuba agütsüogo aser asenoki teti ajangshia aruba Christmas dang nungi khenyongi balaka asütsü," ta pai ashi.

"Ajisüaka Omicron variant potetba ajanga asenok takok tashi katika den majuruteptsü nungdaker aser ibayongji Netherlands mokdangogo," ta pai ashi.

Netherlands nung December 7 nungi 14 tashi tenokdangba agütsüba ajanga tashidak menatapa aoba jenjang shilem 21 agi tajemba kumogo, ta health ketdangsurtemi ashi.

Hong Kong nung legislative council election tenzüko



Hong Kong nung legislative election candidate Fong Lung-fei indang banner ajanga nüburtem senzüba noksa ka yangi angur. Ozüng yanglurtem indang indanga shimtsü ajemdaktsüba aser China sülen anidaker kisüng shimtsü asoshi tashi ka Beijing-i agütsüba sülen Hong Kong nung election mezüngbuba Deobarnü agir.

Hong Kong, Luchii/Dec. 19 (Agencies): China-i election yimya nung temelenshi kar yanglushiba sülen Hong Kong indang legislative council election mezüngbuba agir.

March ita ketdangsurtemi mangatetep aliba "patriots" resolution ka agizüka liasü, koba agi democratic yimya nung nübu shiba kanga ajemdaktsü aser Beijing nem candidate ajunga kanga junga asadangtsü temelaba agütsü.

Tensa azüoktsü atema iba temelenshi ka kanga nungdak, ta Hong Kong nung aliba lenirtemi mapang shia jembia aru. Saka iba yagi yimti nung democracy tashi mait kumdaktsür, ta iba ozüng

anemertemi ashir.

China-i national security law ka benokba sülen iba ozüng ya yanglu, koba agi 2019 kum iba tesem nung nüburtemi longkak aitba sülen democracy busema longkak aiter merenshitsü tezüpaba kumdaktsü.

Voting ya anepdang 8:30 ako (par mapang) nung tenzüker aser aonung 10:30 ako nung shibangtsü. Iba election result ya Hombarnü tashinung ang angutsü imlar.

Legislative Council koba dang LegCo ta ajar, iba ya tashi tait tentet ka lir aser iba yagi Hong Kong nung ozüng balala yanglua amshir.

Iba legislative council nung züngsem 90 aliba nungi 20 dang

shimtettsü, Beijing den aliba Election Committee ajanga züngsem 40 shimtettsü aser shishilempartem ama telok kari züngsem 30 shimtettsü, shirnok akhi mapang nungi Beijing dang metaloka lir.

Sorkar ketdangsurtemi nütsüng yongsük million 4.5 aliba yimti nung vote agütsütsü tenüng zülüoka alirtem dang election nung shilem agitsü ajungshia nüburtem dangi Honibarnü text yoka liasü.

Nisung aikatibo vote magütsür ta polling station tem nungi osang arua lir, anungji nüburtemi shilem agitsüla, ta Beijing busemba party tulutiba, DAB nung tekolakba, Starry Lee-i osangbener dang ashi.

Saka accountant inyaker tetsür kati vote agütsütsü tebilemba mali, ta ashi. "Kü indang vote agi temelenshi kecha marutsü, kechiaser tatem nung Beijing nüburtemi akoktsü," ta lai ashi.

Deobarnü asadanga nung vote agütsür ya taoba mapang dang nungi kanga agi tajemba lir ta sayur. Voting tenzüker ghonda pungo tashinung vote agütsür shilem 14.3 dang liasü, aser kum pezü tejakdang election nung kasa mapang vote agütsür shilem 18.8 liasü, ta

osang ajanga ashir.

Hong Kong nung opposition mesüra democracy busema nokdaker lenirtem aika tepuokdak yua lir, election nung shilem magidaktsür mesüra dang linük nung jenoka lir. 1989 Tiananmen Square nung sepaitemi nisung aika tepsetba aser pua merenshiba bilemteta sentong ka agiba nung shilem agiba mechi May ita activist Joshua Wong ita 10 tepuokdak ayutsü obendang agütsü.

"Ajak shidak lir ama sayuba aser rubber-stamp chamber ka atema nüburtemi vote magütsüner," ta Hong Kong ketdangsurtemi aputsü bushia alisang aser taoba mapang legislator inyaka alisang Nathan Law-i tweet asü, shiba tang UK nung alir.

Longkak aitba temaitsü activist kari nüburtem dang election nung shilem magitsü mesüra ballot tazüng yutsütsü ajungshia liasü. Vote tazüng yutsütsü ya ozüng agi mela lir, saka tangbo yamaji ajungmesotsü mesüra vote magütsütsü ajungmesoba yabo ozüng anema lir.

Election tip-tema agitettsü mechi Deobarnü Hong Kong nung police 10,000 dak tema yoka lir, ta police tekolakba, Raymond Siu-i ashi.

T.Sanny CSB nung züngsemogo

Kohima, Dec.19 (TYO) : Nagaland nung Sericulture Director, T.Sanny Pongener, Central Silk Board, Govt. of India, Ministry of Textiles nung member asütsü atema taruba küm asem asoshi shimogo.

Central Silk Board, Govt. of India nung ya linük ajak nungi tatar yimsüsürtem kar densema

züngsem ajak agi 39 lir aser Northeast India nungibo T.Sanny Pongener ya dang shimteta lir. Pa adenba ajanga linük nung Sericulture maparen nung tajangzük tulu angutsü imlar ta pa Board nung shimba osang nung, CSB, Mnistry of Textiles nung Deputy Secretary (Tech), R.K.Sinhai shia lir.

'Spider-Man: No Way Home' ajanga million \$300 tema aazükogo

Luchii/December 19, 2021 (Agencies): Marvel indang superhero film tasen - 'Spider-Man: No Way Home' sayar külen nungi otsüsüsüsa alima ajunga box office nung takok tulu ngua odar. Sangdong ka ajanga angazükba agi, Honibar (18.12.2021) tashi nung iba film ajanga million \$302.9 shi aazükogo aser Deobar anogo sülen, billion dollar tesadangka dang nungi timba aazüksü imlar.

Jon Watts-i direct asüba film ya America nung sayar sen timba aazükba film rongnung tanabuba kümogo. Hokolbarnü US box office kisüng nung iba film ajanga million \$121.5 shi aazüka liasü. Iba den bendenloksema, bendanglen tesem nung Brehostibar, Hokolbar aser Honibar anogo tashi million \$181.4 aazüka million \$300 tema tuogo.

Honibar tashi nung, million \$300 tema aazükba film rongnung 'Spiderman: No Way Home' ya film trokbuba aser COVID-19 mapang iba alizüng tongtetba film rongnung No Way Home mezüng asütsü.

Bendanglen linük timbaka nung iba film sayatsü renemdar (Sangküm January ita Japan nung sayatsü) asünung, alima ajunga box office nung iba film ajanga ayong ayonga dang billion dollar I dak tema aazüksü, ta Industry analyst temi asadantetter.

Theatre balala nung iba film takok ngua sayaba osang angashia film nung tongti shilem agir, Tom Holland-i social media sabang nung fans dang pelaba lemsatép.

"Anogo ishika tsüngda iba film ajanga sen paika aazükba angudang süngmangseter. Nenok (fans) teyari ajanga takok ngua odar. Nenoki kü dang temeim sayaba aser nungitta yariba ya ajak dang tongtibangtiba. Kü mulung taroktiba nungi nenok ajak dang pelaba lemsatép aser 'Spider-Man No Way Home' mereprangi lira, reprangtsü asoshi mepishir. Nenok ajak dangi Christmas salem anener," ta Tom-i lemsatép.

Maneni, industry nung külem medemer aikati Tom nem tenüngsang agüja liasü. Marvel Universe nung külem superhero Simu Liu (Marvel blockbuster - Shang-Chi and The Legend of The Ten Rings nung Shang Chi shilem agisang)-i, "Film takok ngua sayaba atema tenüngsang agütsür," ta lemsatép.

Kasa mapang, Dwayne Johnson-ia Tom aser No Way Home team ajunga nem tenüngsang agüja liasü.

"Iba film takok ngua lapokba atema pelar. Tom aser film team ajunga nem tenüngsang agütsür. Otsüsüsüsa takok tulu nguogo," ta Dwayne-i lemsatép.

Sangküm August 25 nung 'Liger' sayatsü

Mumbai, Luchii/December 19, 2021 (Agencies): Kanga dang yongya ataba Pan-India film 'Liger', kong Vijay Deverakonda-i tongti shilem agir, iba film sangküm August 25, 2022 nü sayatsü. Iba film nung Vijay den Ananya Panday-i shilem agiogo aser December 31, 2021 nü film indang trailer sayatsü imlar.

Social media nung, film yanglur Karan Johar-i, "Iba film action aser otsü balaka asütsü. August 25, 2022 nü alima ajunga nung #Liger sayatsü terenemba lir aser December 31, 2021 nü iba film indang trailer sayatsü," ta lemsatép.

Nüngtugu director Puri Jagannadh-i iba film yangluogo aser pai ashiba agi, tereprangertem atsüa arutsüsa iba film ya tasa balala meyoktepa yanglua liasü, kong cast balala dena lir. Iba action film - Liger nung, Boxing asayar mongin Mike Tyson-i Indian cinema nung mezüng shilem agiba alimai angutsü.

Iba film yanglutsü osang sangdonger külen nungi film sapurtemi kanga bulua jembia

aruogo, saka Covid-19 tenokdangba ajanga film tangokba maparen aiben thinena liasü. Iba sports drama nung, Deverakonda-i shilem balaka agiba angutsü, koba taoba film nung pai iba amala role agidanga mali. Ano film cast rongnung bendanglen nungi fighter ishikati shilem agiba angutsü.

Maneni, iba film atema Cinematography nung Vishnu Sarma-i yariogo aser Thailand nungi Kecha-i stunt director ama inyakogo. Puri Jagannadh, Charmme Kaur, Karan Johar aser Apoorva Mehta longiemer film atema senotsü agi yaridar.

Taküm küm tetenzüklen January ita Karan Johar, shibai Vijay den külemi iba project nung producer ama inyakogo, pai iba film indang poster ka saya liasü.

Iba film nung tanga cast rongnung Ramya Krishnan, Ronit Roy aser Vishu Reddy nung tongti shilem agiogo. Liger ya alima tesem ajunga nung oshi 5 - Malayalam, Kannada, Hindi, Tamil aser Telugu nung sayatsü sentong lir.



Asür Imjungsangla

MULUNGNEN O

La jajaba lenmang

Hon taribi ama senti temulungjang jajaba anenogo, Meranga inyakba tekatemala anisüngzükogo. Alima nung lai belema inyak, aser kotak nung la anisüngzükger.

Tsüngremi onok temulung raksadaksübaji, Pai tajungtiba agir ta angatetdaksüba mapa ka liasü.

Onoki kanga meima alila, **Lt.Imjungsangla** ajungbena iba lima nungi December 13, 2021 anogo nung pilar, onok mangyim jashi tia nung alidang kija-kibong, arogo, lokti tentet, kidang-kiyonger, medemer aser temeimertem shirnokisa onok dang meima nübo, rongsen, sarasadem aser aria bilem shisa tajung agüja yaritepogo, nenok ajak dang onoki kanga pelaba metetdaksür.

Onoki nenok nisung shia dang tenüngteta pelaba meshitetba atema sasar, ajisüaka Tulusang Tsüngremi nenok ajak talubosa moajangma ta onoki sarasademtsür.

ASLB-I ACHAAYANGA AGIBA ARANGTET TATIDANG

YIMPOKSÜI, 2021

TAKOK ANGURTEM YAMAI SANGDONGER

ACT 201-202 : Tatidang agütsür: 2
2nd Division: Roll No. 1

Takok angur: 2
3rd Division: Roll No. 2

Tamakok angur: Nil

ACT 301-302 : Tatidang agütsür: 9
2nd Division: Roll No. 3, 5, 7 & 9

Takok angur : 7
3rd Division: Roll No. 1, 8 & 10

Tamakok angur: 2

ACT 401-402 : Tatidang agütsür: 10
1st Division: Roll No. 1*, 2*, 4*, 7, 8, 9*, 10* & 11

Takok angur : 10

Tamakok angur: Nil

2nd Division: Roll No. 3 & 6

ACT 501-502 : Tatidang agütsür : 2
1st Division: Roll No. 1* & 2

Takok angur : 2

Tamakok angur: Nil

ADT 101-103 : Tatidang agütsür : 16
1st Division: Roll No. 2, 5, 6, 8 & 12
3rd Division: Roll No. 7, 9, 10 & 16

Takok angur : 12

Tamakok angur: 4

2nd Division: Roll No. 4, 20 & 21

ADT 201-203 : Tatidang agütsür : 8
1st Division: Roll No. 3*, 5*, 6, 7, 8* & 9

Takok angur : 7

Tamakok angur: 1

3rd Division: Roll No. 2

ADT 301-303 : Tatidang agütsür : 8
1st Division: Roll No. 2**, 3, 4, 5*, 6, 7, 8** & 9

Takok angur : 8

Tamakok angur: Nil

PGDT 601-603 : Tatidang agütsür : 15
1st Division: Roll No. 2, 3, 4**, 5, 6*, 8*, 9, 10, 11*, 12, 13, 14 & 15

Takok angur : 14

Tamakok angur: 1

2nd Division: Roll No. 1

Temetetsü:

1. PGDT 701-703 nung tatidang agütsür alir item Roll No.tem iba takoker osang sangdongba anogo nungi ita ka tsüngda nung Dissertation onük office tongtsüsüla.
Roll No. 1, 2, 4, 6, 7, 9, 10, 12, 13 & 14
2. Roll No. sülen * aliba tetezü marks 80 sür tema anguba tamaitü alitsü.
3. Marksheets Aenjeti 10, 2022 nungi angutsü.

Sd/-

Rev. Prof. Rongsen Lkr
Convener ASLB, AC

Sd/-

I. Temjen Tzüdir
Secretary ASLB, AC

BRIT Awards: Adele o Ed nati nomination timba angu

London, Luchii/December 19, 2021 (Agencies): BRIT Awards balala atema Adele-i nomination pezü nguogo. London nung soa intetla, Adele-i November ita la indang kensep tasen '30' sayar sülen, Album of the Year, Artist of the Year, Song of the Year aser Best pop/R&B category nung lai nomination pezü angur asütsü.

BRIT Award nung, arishi küm 33 tain Adele den Dave, Ed Sheeran aser Little Simz nungeri nomination pezüzü ngua lir.

Dave-i Best hip-hop/grime/rap, Song of the Year, Artist of the Year aser Album of the Year category nung nomination nguogo.

Arishi küm 30 tain Ed, shibai October ita '=' saya liasü, pai Album of the Year, Artist of the Year aser Song of the Year den külemi Best pop/R&B category nung nomination ngua lir.

Little Simz-i Best hip-hop/grime/rap, Album of the Year, Artist of the Year aser Best New Artist category nung nomination nguogo. Kasa mapang Best International Artist atema Billie Eilish, Doja Cat, Lil Nas X,

Olivia Rodrigo aser Taylor Swift nungeri tokteptsü.

Arishi küm 18 tain Olivia, shiba May ita la indang mezüng kensep 'SOUR' saya liasü, Best International Song award atema la nominate süogo.

Ano, Best International Group category atema Abba, BTS, Maneskin, Silk Sonic aser War On Drugs teloki tokteptsü. Taküm küm tetenzüklen Maneskin teloki 'Eurovision Song Contest' takok ngua liasü.

Tesüiba anogo ishika tejakdang, Rising Star award naroküm ya Holly Humberstone nem agütsüba sangdongogo.

BRIT Awards sentong ya Maya Jama, Mo Gilligan aser Clara Amfo nungeri ketdang asütsü aser sangküm February 08, 2022 nü The O2 Arena, London nung iba sentong agitsü.

* BRIT Awards nominee

tem yamai alitsü:

- Album of the year:

Adele (30), Dave (We're All Alone In This Together), Ed Sheeran (=), Little Simz (Sometimes I Might Be Introvert), Sam Fender (Seventeen Going Under)

- Artist of the Year:

Adele, Dave, Ed Sheeran,

Little Simz, Sam Fender

- Best group:

Coldplay, D-Block Europe, Little Mix, London Grammar, Wolf Alice

- Song of the Year:

A1 & J1 (Latest Trends), Adele (Easy On Me), Anne-Marie, KSI & Digital Farm Animals (Don't Play), Becky Hill & David Guetta (Remember), Central Cee (Obsessed With You), Dave ft Stormzy (Clash), Ed Sheeran (Bad Habits), Elton John & Dua Lipa (Cold Heart (Pnau Mix)) , Glass Animals (Heat Waves), Joel Corry, Raye & David Guetta (Bed), KSI (Holiday), Nathan & 220Kid & Billen Ted (Wellerman), Riton, Nightcrawlers & Mufasa (Friday), Tion Wayne & Russ Millions (Body), Tom Grennan (Little Bit Of Love)

- Best new artist:

Central Cee, Griff, Joy Crookes, Little Simz, Self Esteem

- Best international artist:

Billie Eilish, Doja Cat, Lil Nas X, Olivia Rodrigo, Taylor Swift

- Best international group:

Abba, BTS, Maneskin, Silk Sonic, War On Drugs

Pulisic nem US Soccer's male player of the year naroküm agütsü



Luchii/December 19, 2021 (Agencies): Chelsea forward Christian Pulisic nem US Soccer's male player of the year naroküm agütsüogo. Ricardo Pepi nem young male player of the year naroküm agütsüo.

Pulisic ya America nunger asayartem rongnungi Champions League final nung mezüng asayaba aser akokba asayar lir. Pai Chelsea nungi Champions League koka liasü.

Chelsea nungi asayaba mapang pai asaya 40 nung goal

trok idaktsüogo aser assist pezü süja lir. April ita Crystal Palace den asayaba mapang pai goal ana idaktsü aser Champions League semifinal mezüngbuba leg nung Real Madrid den asayaba mapang pai goal ka idaktsü.

National team nungi asayaba mapang pai goal asem idakja liasü, kong Mexico den asayaba mapang goal ana idaktsüba densema lir. Pa lenisüba nung US team pezüben tashi asayaogo.

Pennsylvania nung soa intesang yagi taoba ita CONCACAF Nations League final nung penalty ajanga goal ka idaktsü aser World Cup qualifier nunga goal ka idakja liasü.

Kasa mapang nung arishi küm 18 tain Pepi-i September ita national team nungi mezüngbuba Honduras den asayaba mapang goal ka idaktsü aser assist ana sütsü. Iba asaya parnoki goal 4-1 agi akok.

Paisa, October ita Jamaica den asayaba mapang goal ana idakja US nung lanur asayartem rongnung tajungtiba ka aküm.

MLS All-Star Game atema mezüngbuba shimba sülen FC Dallas nungi asayar yagi Mexico nungi masü saka US nungi asayatsü telemtetba agi.

Arishi küm 23 tain Pulisic-i iba naroküm ya 2017 aser 2019 kuma agizükogo aser 2016 küm young player award dena agizükogo. Pa Clint Dempsey, Landon Donovan aser Kasey Keller nunger den yongrü kati iogo, shirnoki iba naroküm asembenben agizüka lir. Pa iba naroküm agizükertem rongnung tanobusang lir.

Vaccine magirtem Liverpool-i manioktsü: Klopp

Luchii/December 19, 2021 (Agencies): Liverpool manager Juergen Klopp-i ashiba agi, Covid-19 vaccine magi alirtem dak lendong keta lir aser club-i vaccine agitsü nongnangertem anioktsü timla kangabo mali.

Aston Villa coach Steven Gerrard aser Crystal Palace coach Patrick Vieira natia, asayar tasen aliba mapang vaccine jenjang asadangtsü akok, kechiyong Premier League nung nisung aika dak tashidak menadar, ta ashi.

October ita EPL sangdong ka ajanga ashiba agi, asayar

shilem 68 nem vaccine dose anaprongla agütsüogo, saka Hombarnü sangdong ka ajanga hopta ka nung nisung 42 dak tashidak menaba sangdongogo.

Club balala nung COVID-19 tashidak poktetba ajanga tang tashi nung asayar 10 tashi thinenogo, kong hopta tatemi asayatsü aliba asaya trok densema lir.

"Asayartem alitsü atema sentong balaka mali, saka ni iba indang bilemdangogo aser vaccine agiba jenjang ya kechi südir süaka asadangtsü," ta Klopp-i ashi.

"Asayar ka vaccine magi lira pa ya onok ajak asoshi lendong lir. Iba ya ken o tebenja. Inyakyim sülen shidak anidakti sera inyaksangshitsü kanga tasak lir," ta paisa ashi.

"Asayar ka dak tashidak menara pa asana alirtem lokti nungi pilaa alitsüsa akümer, anungji iba ya kanga dang tongtibang. Onoki vaccine magiba nisungtem atema ki tasen ka meyaglutsütsü," ta Klop-i ashi.

Liverpool pur tang Premier League nung tanabuba jenjang nung lir. Parnoki asaya 17 nung point 40 nguteta lir.



Tunisia aser Algeria na tsüngda Arab Cup final asayaba sülen Algeria goalkeeper Rais Mbolhi-i Qatar indang Emir Sheikh Tamim bin Hamad Al Thani aser FIFA tir Gianni Infantino na ket nungi takok marok agizükba noksa nung angur. Algeria-i 2-0 agi asaya koka liasü.

Australian Open nung Nadal masayatsü akok

Luchii/December 19, 2021 (Agencies): Rafa Nadal-i, taruba ita Australian Open nung asayatsü atema osang tejangja ka magütsüetetsü ta shiogo. Pa yirur mapang talangka masayai lir Abu Dhab nung Mubadala World Tennis Championship nung asayaogo.

Grand Slam 20 tashi koker aliba asayar ya iba exhibition asayamung nung shilem agiogo, koba August ita Washington nung Citi Open nung asayaba sülen pa asoshi mezüngbuba asayamung liasü. Iba asayamung nung pai Andy Murray aser Denis Shapovalov na makok. Nadal tetsüng yiruba sülen ita pezü asayamung ka nung danga shilem magi-i aruogo.

Taküm pa Roland Garros nung semifinal nung tsük aser Wimbledon, Tokyo Olympics aser U.S. Open nunga masayatet. "Australia-i oa tajungtiba asayatsü bilemdar ajisüaka asayatetsü masayatetsü mejangja," ta

Nadal-i ashi. "Ni ozü team den sensak asemtsü nungdaker. Ni tatemsa official asaya ka nung asayaba sülen ita trok dak tema lir. Ni asaya anaprongla nung asayatetogo anungji tebilembatem ataloktsü akok," ta paisa ashi.

"Ni kü indang career nung tia maka iba tia aiben ajangshitsüsa akümer, saka ni practice asütsü nungdaker aser ni anema alitsü nungdaker.

"Ibaji atalokra ni tanaben asayatetsü. Ni metokteptetsü ta bilemra meyipa marula," ta pai ashi.

"Ni sen atema mesera jangrademtsü atema asayar masü saka ni nükjidong atalokyonga aotsü mesera nükjidong tongtettsü atema meranga inyakba inyakyim jangradema ajangshitsü atema asayar. Ni takok mongutetra kecha masü, saka tejangrababo meremsepi lir," ta Nadal-i ashi.

Australian Open ya January 17 nü tenzüktsü.

South Africa Test atema KL Rahul vice captain asütsü shimogo



New Delhi, Luchii/December 19 (Agencies): South Africa den India team Test asaya asem asayatsü aliba atema vice-captain asütsü KL Rahul shimogo. Vice-captain Rohit Sharma yiruba ajanga SA den Test nung masayatetsüsa akümba sülen December 15 nü selector tem iba mapa ya Rahul nem agütsüner ta shia liasü.

Rahul nem iba mapa agütsüba ajanga selector aser team management-i team nung lenir tasen anioktsü atema inyakba jangja jangja sayur. Temetetsükaji taküm England den Test asayaba mapang Shubman Gill aser Mayank Agarwal na yirur masayatetsüsa akümba sülenang Rahul asayatsü atema maongka ngua liasü.

Test asaya nung Rahul-i junga masayatetba ajanga pa jenjang mejangja liasü. England den test asaya atema pa middle-

order nung temelener ama aniok. Ajisüaka Rahul-i condition tamajung nung kanga junga asayatetba atem selector temi pa dak temulung lemteta aküm.

Pa T20I vice-captain asütsü shimatokogo aser South Africa series atema ODI asoshi selectors tem ajurutepba sülen pa nem iba format nunga vice-captain mapa agütsütsü imlar.

Iba jenjang agiba ajanga Ajinkya Rahane aser Cheteshwar Pujara nunger nema parnok mapang tetembanger ta temaitsü ka sayuogo.

Rahane lenisüba nung India team-i taküm küm tetenzüklen Australia akok, ajisüaka junga masayatetba asayar ka nem team lenitsü atema selector temi iba mapa koda magütsüeteti aküm.

Maneni team management-i middle-order nung temelenshi atema inyaktepdar aser iba atema Shreyas Iyer, Hanuma Vihari aser Shubman Gill nunger anitetsü asatepdar.

Team nung R Ashwin anioktsü asadangogo, ajisüaka bendanglen oa Test asayatsü atema team management-i pa shimtsü atsüayonga liasü. Ajisüaka Ravindra Jadeja temekok yiruba ajanga masayatetsüsa akümba sülen pa iba asayamung nung asayatsü imlar.

BILEMDANGANG

"Ochi nung nokdakba atema taitsubatem agizükang."